

甘棠小志

甘棠小志卷二目錄

記湖緒第三

記河渠第四

記修防第五

甘棠小志卷二

甘泉董醇醞卿甫著

記湖瀦第三

邵伯司境湖之在官河上岸者六。

萬厯江都縣志言邵伯黃子赤岸新城白茆朱家六湖皆在官河上岸水相連接按瀕湖之鎮惟公道橋倚九龍岡隸上官司自公道橋迤東湖地皆隸邵伯司。

曰邵伯。

雍正揚州府志言邵伯湖在府城東北四十五里東接艾陵湖西接白茆湖南通新城湖北接甓社湖每春夏時湖水漲漫民

田渰沒。晉太傅謝安出鎮廣陵。修築湖埭。隨時蓄洩。田始獲歲。

民被其澤。比之邵伯甘棠。因名湖與埭焉。按雍正志言邵伯湖。

東接艾陵湖。蓋據邵伯鎮北。未開越河時言之。鎮北越河。即今官河。越河。

開於萬厯二十八年。兩湖爲漕隄所隔。萬厯縣志已言邵伯湖。

在官河上岸。艾陵湖在官河下岸。則邵伯湖之不得東接艾陵。

久矣。嘉慶重修府志削之。嘉慶府志無東接艾陵湖四句。是也。附錄宋陳造邵。

伯湖停舟避雨詩。窗度菱荷風。舟艤鴛鴦浦。落帆憩篙師。辟此。

白淙雨。長征取愜快。留滯不云苦。適喜懸麻勢。爲盪鏢石暑。去。

年舟繫柳。臥看虹飲渚。龍公會事發。尙記跳珠語。崎嶇不諧俗。

似爲龍所予。一杯酬新涼。開餅先醑汝。明于慎行邵伯湖夕泊  
詩。日暮倚蘭橈。秋江正寂寥。驛門斜對雨。郡郭遠通潮。急櫓看  
商舶。寒燈見市橋。隋隄前路近。欲聽月中簫。趙鶴過邵伯湖詩。  
湖口人家佳處幽。桃花蹊下晚驅牛。水耕誰信爲農苦。春望何  
妨作客遊。落日波聲侵短竹。平沙風色帶眠鷗。送行最愛長隄  
柳。直到官河綠未休。李東陽夜過邵伯湖詩。蒼蒼霧連空。冉冉  
月墮水。飄飄雙髯風。恍惚無定止。輕帆不用楫。驚浪常在耳。江  
湖日浩蕩。行役方未已。羈旅正愁絕。况乃中夜起。國朝彭孫  
適過邵伯湖詩。斜暉低驛路。馬首悵何依。晚渡潮爭上。寒塘人

獨歸溪魚時自擲。水鳥慣卑飛。願逐垂綸者。高歌入釣磯。

曰黃子。

雍正嘉慶府志皆言黃子湖在府城北六十里。東通官河。西至末口。嘉慶志又言黃子湖東通邵伯湖。蓋東通邵伯湖而後至官河也。水經注言中瀆水北通射陽湖。西北至末口入淮揚州水道記言末口卽北神堰。方輿紀要言北神堰在今淮安府北五里。然則黃子湖必北歷高郵寶應諸湖。然後以次漸至末口。府志特言其略耳。附錄吳綺黃子湖詩。晚歲甘幽僻。謀居就水涯。庭虛容看月。地做足栽花。老鶴宜三徑。閒鷗共一家。夜來清

夢穩不復聽城笳。江閩至黃子湖訪外舅詩。扁舟四望水漫漫。天地偏從曠野寬。雉兔隨時供射獵。魚蝦鎮歲足盤餐。遠連暮靄村烟碧。近接秋原木葉丹。一事略爲筋力累。風前月下愛投竿。閩字辰六。吳湖州壻也。

曰赤岸。

雍正府志言。赤岸湖在黃子湖西。嘉慶府志於甘泉赤岸湖下言。在黃子湖邊。於高郵塘下湖下言。在州西四十里。通甓社湖。一名赤岸湖。蓋高郵甘泉接壤處也。阮慎齋北湖續志言。其地多柳。道光十九年。阮相國築太平隄。植柳二萬株。名之曰柳湖。

快雪堂帖云蔡明遠鄱陽人。真卿昔刺饒州。卽嘗趨事。及來江  
右。無改厥勤。靖言此心有足嘉者。一昨緣受替歸北。中止金陵。  
闔門百口。幾至餬口。明遠與夏鎮不遠數千里。冒涉江湖。連舸  
而來。不愆晷刻。竟達命於秦淮之上。又隨我於邗溝之東。追攀  
不疲。以至邵伯南埭。始終之際。良有可稱。今旣已事方旋。指期  
斯復。江路悠緬。風濤浩然。行李之間。深宜尙慎。太傅言。右唐顏  
真卿帖所謂邗溝之東邵伯埭南。確是此時赤岸湖口入柳堂  
之處。大忠古賢與蔡明遠相接之處。緬懷可憶。然則宜在堂東。  
按阮文達萬柳堂在公道橋東北八里。當赤岸湖地。故云然。文



達當代名臣大忠古賢後先輝映已附錄李聰赤岸湖詩幾處  
濃陰勝畫圖家山回望未模糊多情一路青青柳。饒社湖連赤  
岸湖。挂帆直抵水之涯。中住高人一二家。我到正逢三月節。窗  
前開遍碧桃花。聰字達仁高郵人。又范荃和吳綺歸湖詩。湖山  
踪跡未云孤。欲翦輕綃繪作圖。春雨一犁耕苜蓿。秋風滿棹采  
菱蒲。雞豚集散黃橋市。蝦菜船回赤岸湖。我愧半生虛度此。漫  
敲詩句苦撚鬚。

曰朱家

雍正府志言朱家湖在府城東北五十里東通官河西至末口。

嘉慶志亦言朱家湖在城東北五十里豐樂鄉東通官河西至末口按兩志說朱家湖西至末口皆約言之與說黃子湖同其實距末口絕遠嘉慶志志河渠又言朱家湖與邵伯湖相連之處名湯家絆北湖小志作泮蓋朱家湖尙在邵伯湖之南其距末口絕遠可知又六湖記言朱家湖或謂之珠璣湖

曰白茆

嘉慶府志言白茆湖在府城東北四十五里名勝志言白茆湖舊有斗門橋官河水涸則引湖水以濟漕運府志又言白茆湖在黃珏橋鎮東南新城湖在白茆湖之南朱家湖在白茆湖東

新城湖北過湯家汴爲邵伯湖。又北過東莊嘴爲黃子湖。又西爲赤岸湖。

曰新城。

府志言新城湖在府城西北四十五里豐樂鄉東通官河西抵民田水四時不竭民獲其利按焦氏循以此爲晉新城所在劉

氏文淇不以爲然

詳建置篇

六湖當郡城之北統稱北湖。

北湖小志言上河皆湖也其在甘泉境者郡人謂之北湖北湖續志言揚州運河以西郡城以北爲北湖。

六湖者上承高寶諸湖。

寶應縣西岸上自淮安裏河廳與揚河廳交界處入境南爲葉

雲洞又南爲葉雲雙閘又南爲竹絡埧又南爲王壩洞水通白

馬湖

在寶應縣北十五里東西長十五里南北闊三里

有張大夫溝

在縣西北十里

白馬湖與

青蕩湖匯爲一

此寶應境內之青蕩湖也在官河上岸甘泉境內亦有青蕩湖在官河下岸詳見下文

運

隄又南爲北宏濟大閘又南爲南宏濟大閘卽瓦甸閘又南爲

通湖小閘又南爲減水埧隄外爲清水湖

在縣南東西長十二里南北闊十八里

南連汜光湖

在縣西十五里東西長三十里南北闊十里

汜光湖南會精湖

在縣西南六十

里東通

西通曬火湖

在縣南四十里

曬火湖西通衡陽湖

在縣西南六十里

此諸湖統名寶應湖。由草子河西北接高堰。又迤南行有南北束水隄。上承五埧。又通洪澤湖。蔣家埧河諸湖之西有陰騭河。白水塘更在諸湖之西。運隄又南至界首。西岸入高郵州境。又南爲通湖閘。又南爲通湖港。二十有二。湖水漲發始開放入運。高郵諸湖北連汜光白馬。而通洪澤。凡天長以東諸水盡匯此。湖長闊一百五十餘里。嘉慶府志言湖之名目繁多。然皆無畔岸。莫可主名。今姑據舊志列之。蓋當時猶未匯爲一也。曰新開湖。在高郵州治西北三里。曰麇社湖。在州治西三十里。嘉靖志云卽高郵湖。曰平阿湖。在州治西八十里。曰珠湖。在州治西七十里。曰張良湖。在州治北二十里。通天長縣桐城河。曰珠湖。在州治西七十里。曰張良湖。在州治北二十里。通七里湖。

曰石臼湖。

在州治西北五十里通錢社湖。

曰姜里湖。

在州治西五十里通塘下湖。

曰七里湖。

在州治北十七里。

曰鵝兒白湖。

在州治南二十里通張良湖。

曰武安湖。

在州治西

南三十里。

曰塘下湖。一名赤岸湖。

在州治西四十里通錢社湖。

以上高寶各

湖支港時或分洩入運然大較則與邵伯諸湖相灌輸又行水

金鑑言新開湖在高郵州長三十五里方輿紀要言新開湖州

西北三里其水東南俱通運河長闊各百五十里嘉靖志言新

開湖卽高郵湖揚州水道記言宋始有新開湖楊萬里有過新

開湖詩新開湖之名著而樊良湖之名晦。

太平寰宇記高郵有樊良溪在縣北二十

里州志以爲卽古樊良湖是樊良湖之名久晦矣。

新開湖在城北三里長三十五里樊

良湖在州北二十里。則是新開湖已並樊良湖爲一矣。按方輿紀要謂新開湖長闊各百五十里。嘉靖志謂卽高郵湖。然則高郵湖可以統新開以下諸湖之名。新開湖亦可以統高郵境內西隄外諸湖之名。其所並爲一者。固不獨樊良已也。旁受西山之水。

嘉慶府志言、邵伯湖西南有楊壽埧、大儀等處之水入焉。又西南庇豐庵有支河、甘泉山後老埧橋諸處之水入焉。按邵伯諸湖所匯之水甚夥。詳見下文府志蓋約言之。

以入運濟漕者也。

暨河渠篇

邵伯境由湖入運自黃泥港至母家港凡十三口。詳河渠篇。最

北之露筋小河口久經堵閉不計。

六湖水則相通地則相錯談者誠未易一一指其所。

焦里堂循六湖記分析湖界最明畫記曰甘泉之湖在官河上

岸者六曰邵伯湖曰黃子湖曰赤岸湖曰朱家湖曰白茆湖曰

新城湖今里人以在南者爲朱家湖在北者爲黃子湖在南北

兩湖之間者曰邵伯湖以黃子湖中高阜爲赤岸湖問白茆新

城之名莫有能舉者矣舊志謂赤岸湖在黃子湖西然則近官

河而在九頃頭以東者爲黃子湖其九頃頭以西爲赤岸湖統



名之爲黃子湖耳。高阜也。而湖云乎哉。舊志云。黃珏橋在黃子湖南。白茆湖北。然則白茆湖在黃珏橋南矣。黃珏橋至鰍魚口十五里。紅廟半之。今呼紅廟以東爲朱家湖。然則紅廟以西爲白茆湖矣。今按其地。自北而南。有劉家嘴。橫互水中。其南有李家嘴。自西南指於東北。其東有老鶴嘴。自東南指於西北。三嘴相湊。界爲三湖。由劉家嘴而西爲白茆湖。由李家嘴而南爲新城湖。故舊志云。邵伯湖西接白茆。南連新城也。晉書言謝安出鎮廣陵之步邱。築壘曰新城。又築埭於城北。後人追思之。名爲邵伯埭。以新城名湖。必其地當新城。以邵伯名湖。必其地當邵

伯埭邵伯湖在邵伯鎮北十餘里。而邵伯鎮恰當新城湖。然則邵伯鎮晉之新城古之步邱也。邵伯湖側古邵伯埭所在也。明陸弼江都志云。浮城岡在城北二十八里。豐樂鄉新城湖中高二丈。周四十餘丈。舊有新城基。余詢之里人。無浮城岡。有蕪城墩。俗名蒲扇墩。在東西灣。離邵伯鎮六七里。余特泛舟至其地。岡上有廟曰文峯禪院。登而望之。去湖甚遠。弼之所指。恐非謂此。其所謂新城基在湖中者。果何地歟。舊圖邵伯湖之南有董家湖。規其所在。蓋卽白茆新城朱家三湖。今劉家嘴以西有董家嘴。其所當之湖。卽白茆湖之東。然則所稱董家湖者。將謂是

耶。而志書又謂白茆湖有斗門橋。官河水涸。引湖水以濟運。是又通朱家湖爲白茆矣。今定之。白茆湖在黃珏橋之東南。其東爲朱家湖。朱家湖之南爲新城湖。朱家湖之北越湯家泮爲邵伯湖。邵伯湖繞東莊嘴而北。東抵露筋祠。爲黃子湖。黃子湖之西至公道橋渡口。爲赤岸湖。是爲甘泉上河。六湖焦氏北湖小志敘水首篇。記湖中支汊尤詳。覈並錄之。揚州之運河自寶應黃浦入界。至瓜洲儀徵。達於江河。以東曰下河。河以西曰上河。上河皆湖也。其在甘泉境者。郡人謂之北湖。東東於運隄。西受西山諸水。北受高郵湖水。方三十里。而灘隈隴阜錯落其中。若

爪若角若木之交枝。非生長其閒。往往迷其棹焉。自邵伯鎮之北五里。由官河達於湖。曰鰍魚口。由鰍魚口而南。湖水過老鸛嘴。又西。新河口之水入焉。又西。過許家廠。又西。嚴家淘之水入焉。又西。爲薄劉家嘴。又西。爲楊家渡。釣魚臺之水入焉。新橋之小水亦入焉。又西北。過李家嘴。又歷孫家嘴。有錐淘。又西。過陸家嘴。開元寺在其南。謝家橋之水入焉。又西。過沈家嘴。季家嘴。率黃珏橋隄而北。至睦家嘴。澗陳埧之水由橋下入焉。湖水繞鎮而北。半里。過裔家莊。與季家嘴對湖相望里許。又東。半里。至屠家嘴。高家橋之小水入焉。少東。爲東嶽廟。又東。爲竇家嘴。又

東爲戴家窪。湖水竄入。又東南爲董家嘴。與沈家嘴南北相對。其東有大隈。互於湖。爲劉家嘴。與李家嘴南北相望。若門戶。東則爲朱家湖。湖水過劉家嘴而北。彫胡洶之水入焉。湖水又東北過火家洪。畢家洶之水入焉。洶側有紅廟。紅廟之東北有地藏庵。蓮花寺在其西北。又北折其水如帶。岸形若月。爲湯家泮。是地不生黿。相傳有術士過而禁之也。由湯家泮折而西。有郝家樓。又西爲蔣家灘。又西過馬家嘴。又西繞解家嘴。龍灣洶之水入焉。又北過崔家嘴。又東北過南田家嘴。板橋之水入焉。又東北爲北田家嘴。又東北過土城口。汪家洶之水來會。又東北。

梁家巷之水入焉。又北爲東莊嘴。由東莊而北爲黃子湖。由東莊而南爲邵伯湖。龍灣洶之口有大小兩張家墩。墩北當田家嘴。東有灘長三四里。作三角形。在湖中。爲管家尖。管家尖之西北當汪家洶。有老屋基。基上鋪瓠簋。又稱李家莊。河淮未合之先是爲陸地。莊宅之形尙可驗矣。昔時管家尖種藕。夏月花開。爲湖中大觀。乾隆四十年大旱。飢民掘食之。盡。因改爲稻田。然在湖心。稍溢則沒耳。湖水繞東莊嘴而西。過郭莊。又西北有水如帶。其北灘長五六里。爲九頃頭。其南有大帝寺。今圯。又西少南。燒香港之水入焉。又西過南王墩。墩南有治平寺。寺南爲梁

家巷有八角井。傳爲唐時故蹟。不可考。少西。大淘之水入焉。湖水由大淘而西。過周家嘴。又西。小淘之水入焉。又西。過王家嘴。迤而南。一灘銳而西出。爲蕎麥尖。又西。廟灣之水入焉。湖水西過廟灣口。至馬家嘴。有小水。自秦家酒店來入焉。又西。爲張田家嘴。又南。有小水界之。又南。爲韋家嘴。又南。界以小水。其西南有避風庵。自避風庵渡而北。抵九龍岡。公道橋之鎮在焉。先是有湖口橋。長半里。橋久廢。故改爲渡。湖水繞鎮而東。過窯東嘴。又東北。過陳家花園。歐陽墩在其北。又東。至卜倉。倉前有水。如帶。其東南爲窯灘。窯灘與張田家嘴相對。其東卽黃子湖。趙輯五云

以圖考之。當波濤壯矣。由窯灘而東北過趙家嘴。又西北爲陳是赤岸湖。

家洶。洶水抵雙塘東。洶水又北過唐家嘴。三官殿之水入焉。洶

水又東過珠湖草堂。

北湖續志言。今名南萬柳堂。

又東爲倪家嘴。有小水在

嘴中。洶水至倪家嘴。會於湖。湖水北過倪家嘴。金家灣之水入

焉。又東北過顏家嘴。與九頃頭相對爲門戶。其西爲赤岸湖。其

東爲黃子湖。傲姑寺在其北。湖水由傲姑寺而東。有沙家尖。長

三四里。橫互而東。湖水繞沙家尖而西北。橋頭之水入焉。又北

潘家埧之水入焉。又東北繞林家嘴。有洶界其北。又西過華家

嘴。又西過宰家灘。司徒廟在其南。又西南過盛家嘴。其西有柏



家渡。又南過王莊。北湖續志言望湖草堂在莊西。莊西有真武廟。王德橋之水

入焉。其西爲胡家渡。其南爲西湖嘴。北湖續志言今名三十二西湖。嘴之西南

有小張家渡。又南。紅蓮埧之水入焉。又西北。董家橋之水入焉。

又北。李家橋之水入焉。又北。至徐家埧。蜻蜓橋之水入焉。又北

爲張家渡。渡口有普渡庵。其北屬高郵。自柏家渡至小張家渡。

統曰野牛灣。又曰野溝灣。鰍魚口之東爲河隄。隄以西皆湖。有

相墩在其北。水中墩上有近湖草堂。邵伯相氏之別業也。墩北

爲盧家嘴。其西有馬家莊。又西有樓子莊。皆閒以小水。樓子莊

與湯家泮一水相望。而兩湖之頸也。湖水沿東隄。又北過嵇家

閘又北過荷花塘。又西北過腰鋪。又西北過露筋祠。又北爲三十里鋪入高郵界。

官河下岸舊有五湖。

萬厯志言、艾陵大石葑塞滌洋、瓊子五湖皆在官河下岸受水者也。

曰滌洋。

滌洋水經注作陸陽。云中瀆水自廣陵北出武廣湖東陸陽湖。西水出其閒下注樊良湖。按武廣湖卽今武安湖。陸陽湖卽今滌洋湖也。唐張薦答權載之書云、寶應中相國丈被褐營道、寓

居陸陽。謂權載之寓居陸陽湖也。府志於甘泉縣下云。涿洋湖。在府城東北六十五里。艾陵鄉西南接艾陵湖。東北半屬高郵。又於高郵州下云。涿洋湖在州南三十里公田村。通小涇溝。邵伯汎圖作小金溝。西南接艾陵湖。半屬甘泉。甘泉高郵蓋以湖心爲界。又按涿洋艾陵兩湖之間。尙有荇絲湖。詳見下文較兩湖差小。故志於說涿洋湖時略之。

曰葑塞。

今荇絲湖也。江運廳冊甘泉續志俱作恆子湖。按雍正嘉慶府志并言葑塞湖在城東北五十里艾陵鄉。北通涿洋湖。南接艾

陵湖是葑塞湖。當在淶洋之南。艾陵之北。今北通淶洋。南接艾陵。在兩湖間者。爲荇絲湖。別無葑塞湖。又嘉慶志於志河渠言。昭關埧下支河入荇絲湖。北入淶洋湖。又南二閘三閘引河入荇絲湖。又南毛家橋閘家橋支河匯入南塘。歸艾陵湖。亦敘荇絲於淶洋之南。艾陵之北。府志於山川志葑塞。不志荇絲於河渠志。荇絲不志葑塞。知葑塞湖卽荇絲湖也。劉瞻衡同字言。荇絲湖草青。莢一色。方蒂白花。清芬襲人。梅蘊生植之以爲白蘋。瞻衡又言。荇絲湖西面沿河上五莊附錄。國朝郭元鈺葑塞湖牛鳴雙村詩。石架瓜籬白竹門。桔槔聲歇打場喧。老農八十

今間得。捕蝨殘陽倚廢垣。曉風如箭宿雲屯。白樹溪橋紅葉邨。  
人事不來書卷合。一樓寒雨看秋原。年年塵蹟滯天涯。柳綠成  
邨稻沒車。爲把閒廳僦閒客。秋來賺種滿園花。

曰艾陵。

江都陸志言、艾陵湖在城東北四十五里邵伯鎮之東。太平寰  
宇記言、合濱渠東有小渠闊六步五尺。東去七里入艾陵湖。阮  
昇之記云、齊高帝建武五年遏艾陵湖水立裘塘屯。按昇之紀  
年有誤。府志言、齊高帝紀號建元。至四年而止。建武乃明帝年  
號。亦無五年。是也。劉瞻衡言、艾陵湖北苻絲湖南地。南北約五

里東西約十五里。皆屬下橋鄉。又按說艾陵湖者皆云東西長若干里。趙輯五增瑞言。自楊家莊南三里入湖。沿右岸行。船首皆西南。非直西也。附錄國朝朱冕艾陵湖鷗波草堂詩。落盡紅衣水拍天。草堂人坐白鷗前。攤錢遠市旋沽酒。買米比鄰亦放船。結納是君兄弟好。詼諧容我性情偏。山杯不惜勞相勸。明日枯查泛冷烟。冕有臥秋草堂集。

曰甕子。

按雍正嘉慶兩府志。江都陸志甘泉吳志均言甕子湖在淶洋湖。西今淶洋湖之西。惟運河分洩入湖。有火姚閘等引河。

府志高郵

大桃閘水入淶洋湖甘泉境。自淶洋湖濱西抵運隄實無甕子。入淶洋湖諸水詳河渠篇。湖蹟惟江運廳圖越運河而西有甕家營或卽邵伯鎮北未開。越河卽今官河以前爲斯湖舊地未知是否。

曰大石。

大石。太平寰宇記作岱石。云江都茱萸溝在縣東北十里。從合瀆渠東過茱萸埭七十里至岱石湖。又西四里對張綱溝入海陵界。府志言大石湖在城東北四十五里平遼鄉。江都陸志作平遼鄉舊

傳湖有石。依約見水中。亦曰岱石湖。又曰棹石湖。通張綱溝。漢廣陵太守張綱於揚之東陵邨開渠引大石湖水溉農田。民利。

之呼爲張公渠。宋元豐中，羅適爲江都令，復濬大石湖，廣袤數百步，改名元豐溉田千餘頃，收皆倍。按大石湖舊蹟，蓋在邵伯境南，接江都縣界。府志大石湖列甘泉，張綱溝，張綱鎮皆列江都。雍正志言，張綱鎮在城東三十里，鎮東北二里，卽古大石湖。湖今爲平壤，是也。湖則已湮，而漢之張、宋之羅兩公政蹟固自可紀。

今甕子大石兩湖湮廢，祇存其三。

府志於志山川並列甕子大石，存故蹟也。於河渠祇敘淶洋、荇

絲、艾陵三湖，斯爲紀實。三湖之委皆曲折赴海。

詳河渠篇

艾陵之南有小湖曰青蕩，附庸而已。



青蕩湖。徐積山文集作星塘。青蕩湖東南兩面屬周墅鄉。西北兩面屬水西鄉。北距艾陵湖約十里。皆水西鄉地也。湖名府志廳冊均不載。惟邵伯汎圖有之。劉瞻衡言。滌洋湖長闊均約十餘里。苕絲湖長闊均約五里。艾陵湖東西約長十餘里。南北約闊五里。青蕩湖最小。東西約長五里。南北約闊三里。李漢南卽言。滌洋湖南北約長十八里。東西約闊十里。苕絲湖長闊均約七里。艾陵湖東西約長十六里。南北約闊三四里。青蕩湖闊尙不及二里。趙紫卿驪言。艾陵湖實長十五里。并云自油坊頭入湖。沿北岸七里至官莊。又八里出湖。

記河渠第四

凡水之在運河以西者皆匯入北湖。

北湖凡六。邵伯湖。黃子湖。赤岸湖。朱家湖。白茆湖。新城湖也。郡人統謂之北湖。焦里堂循北湖小志敘入湖之水。最詳備錄之。其西北一水自井家莊來。東北過范家埧。又東北過楊家埧。至廖陳家莊北。一水自紀家山南來。歷葛家酒店北。過唐家營西。與井家莊水合。又一水自北來。由張李家巷過田家小橋南折。至廖陳家莊。三水合流。至草隗帝廟南。過朱家大橋。橋之南有宋家橋鎮。鎮有紫竹庵。關帝廟。橋北有壓鎮寺。壓家橋之水自

南來。過茅家橋。又北過馬家橋。合四水爲涼月灣。迤東南過郭家集。至張家渡。繞丁家嘴。入野牛灣。其西一水自黃泥窪來。窪在大儀鎮東。南流五里至田家小橋。一水自段家埧東北來。會又一水自鳳皇嶺東北來。會總至楊獸醫埧。埧南有關帝廟。廟中牡丹數百年高丈許。相傳有神。又東北流至方家大橋。一水自巴家墳來。七里至黃家磚橋。過寶女墩。南至楚家鋪。尤家澗之水自南來。會。又東過茅勝橋。橋北有茅勝庵。又東北過劉家橋。又東北至曹安寺小橋。又北至方家小橋。橋南有方家集鎮。又東北過雙車篷北。徐家溝之水自南來。會。又北過文氏深柳。

堂西鷺鶯溝之水來會。又北過許家巷。折過建隆寺北。方家大橋之水。過徐家嘴東北。至建隆寺北。二水交會。爲鵝頸項灣。灣以南。兩水環抱。屈曲如菱花。其間爲荒湖。荒湖之中有高阜。建隆寺在其上。立阜以觀。兩水如龍蛇蜿蜒而投焉。荒湖者。湖久淤。農以爲田。稍溢則仍成爲湖。故未易湖之名云爾。鵝頸項灣之水。北過戒壇寺西。長生橋之水入焉。又過胡家嘴東。入公道橋。渡會於黃子湖。其西南一水自方家祠來。過朱家大橋。橋東南爲方家巷。又北過秦家橋。秦觀察墓在其西。又北至王家屯。一水自桑家巷來。巷在甘泉山東北里許。又東北過天竺庵北。

又東北過房莊東南來會。又北過雨膏橋。舊名火燒橋。閻公墳在其東南。一水西自石灰莊過老墳橋來會。又東過誦芬莊南。又東北過澗陳墳。一水自江家沖會於南。一水自獺貓墳來會於北。又東過郭葵心墓北。焦氏祖塋南折而北。過焦下莊東。鯽魚塘之水會焉。又北。焦上莊之水會焉。又北。倒稜溝之水會焉。又北。過黃珪橋東南。繞睦家嘴至三汊港。入於白茆湖。其南一水自龔家沖來。沖在郡城北十五里。東流至龔家橋。北折過南靳家橋。一水自陳家大莊過北靳家橋來會。二水合流。東至周家橋。又東至杜家橋。賈家橋在其北。東北有元通庵。又有守貞

庵。又東過陳家橋。橋東南有梅影庵。又東北過楊林家橋。又北過許家巷西。又北至釣魚臺。一水自胡家橋東過蔣家橋東。又過耿家閘。耿中丞墓在其北。北有西來庵。一水自陳家巷東北過龜月橋會焉。兩水合流至釣魚臺。與龔家沖水會。又北至姚家橋。橋東有北方寺。在高阜處。一水自湯莊潘莊來。東過徐家橋。又東過錢家沖。沖南有南觀音寺。又東過紀家橋。又東北過卜家橋。房孝子墓在其南。又東北過廖王家橋。又東北與姚家橋水合。又北爲楊家渡。一水自鄭家莊東流入大塘稍。又東過棺材跳。又東北過桃花橋。入楊家渡。其東南一水自皇墓墩東

半里過高娘子橋。一小水自馬郎家巷來會。其北一里有吉家庵。又東過祝家大廟南。又北折爲陳家溝。桑營在其南。有龍王廟。又北至蒲扇墩。其南有相公廟。又北過葛家大莊東。其西南有福田庵。又北合△家港。按卽母家港。分二支。西一支過尤家窪南。

又西北過孔家橋。又北至新河口入於湖。東一支北過七截橋。

又北過福壽茶庵東。一水東至美棠橋。按當是隱棠橋。卽惠政橋。來會。又北。

至鰍魚口入於湖。按今隱棠橋水出鰍牛港口入運。七截橋水出梁家港口入運。與母家港皆水由湖出。非

水入湖也。焦氏所言或湖。按以上所敘各水皆來源距湖較遠。水低涸江湖盛漲然耳。

不盡在司境者。然其委則皆入湖北湖。志又言黃珏橋北一水。

自錐坝來與石橋水合流。東過周湯橋。匯爲朱家汪。一水北自安基寺來會。東過崔家嘴南。又東過戴家窪北。又過趙家嘴西。爲龍灣淘。又北過張家墩與板橋水合。又東北過管家尖。爲葫蘆淘。入於邵伯湖。大淘之水。一支自眞武廟會於南。一支自土城口會於東。一支自錢家巷會於東南。其閒廣闊深浚。北過周家嘴東。兩嘴相束。爲大淘口。入於黃子湖。小淘之水。自五車頭北來。過談家橋。又過王家嘴東。入於黃子湖。黃珏橋西。一水自羅家橋東北流。繞堰橋嘴。一水南自坝磯頭來入焉。又一水自鶴公橋東。合二小水。屈曲來會。又北過薛家嘴西。孫家園東。爲



孫家渡一水自錐埧北轉魚墩來過大竹墩西與城隍廟南小水合。又北過廟頭鎮。鎮南鎮北兩小水入焉。又北過司徒廟西五車頭北。合二小水來會。至都天廟南入孫家渡。又北過劉家嘴東。又北過蕎麥尖入於黃子湖。水深曲。雖赤旱不竭。統稱曰廟灣。公道橋之水一自阮千戶墓南過陳家橋至九龍岡入於湖。一自康營來過朱公廟。又東過孔家橋。又東過于家埧。又東至胡家嘴。入於荒湖。赤岸湖之水一自三官殿北東流過姚家跳入金家灣。一自金莊入金家灣。一自橋頭東過徐家廠。又東北至沙家尖入於湖。一自潘家埧東流過談明橋。又東北繞林

家嘴入於湖。一水自東嶽廟西江倉南屈曲過王德橋。合王氏  
上下兩莊水。西又一水南自燕莊來合。共入胡家渡。一水自三  
里橋東北至周蠻子橋。又北過紅蓮埧。一小水自東來合爲小  
張家渡。一水自董家橋東北流至小張家渡。入野牛灣。按以上  
各水源皆近湖者。此北湖小志敘水下篇文也。其湖中支河汊  
港具敘水上篇。詳湖  
滄篇

由湖入運

江運廳冊言。西岸分洩湖水入運各港。有露筋小河。按此河口  
今堵閉。  
黃泥港。通湖閘。通湖港。鮎魚港。菜花港。奶奶廟港。陳家港。按一  
名城

隍廟。木排港。紅橋港。小石橋港。鐵牛港。梁家港。母家港。嘉慶府

志言。運隄西岸入甘泉縣界。有小河口。又有露筋閘。外爲邵伯

湖。舊謂此湖東接艾陵。西接白茆。南通新城。北接寶社。自築運

隄之後。邵伯湖在上河。艾陵乃在下河矣。邵伯湖與黃子等湖

通。黃子湖在府城北六十里。東通邵伯湖。赤岸湖又在黃子湖

西。朱家湖在府城北五十里。其湖與邵伯湖相連之處名湯家

絆。新城湖在府城西北四十五里。白茆湖在府城東北四十五

里。萬厯志云。此六湖皆在官河上岸。水相接連。邵伯湖西南有

楊壽埧。按卽楊大儀等處之水入焉。又西南庇豐庵有支河。甘

獸醫埧。

泉山後老埧橋諸處之水入焉。按楊壽埧大儀等處及甘泉山老埧橋諸處入湖之水。卽北湖

小志所載諸水。運隄又南。按此處漏。敘黃泥港。爲荷花塘。按今東岸有荷花塘正埧埽工。

小志詳府志略。又南。按此處漏。敘通湖港。爲三溝閘。按今東岸有三溝閘埽工。又南。按此處漏。敘通湖港。爲鰍魚

港。爲菜花港。爲廟港。按卽奶廟港。爲陳家港。爲木排港。爲紅橋港。按此

處漏敘小石橋港。爲鐵牛港。爲梁家港。爲母家港。按北湖入運諸口。府

志稍略。當以江運廳冊爲斷。其港口河道寬長丈尺。詳修防篇。

又按黃泥港口。在貞應祠北。東岸迤南。直露筋鎮。通湖閘。東岸直竹林寺。通湖港口。東岸迤北。直三元庵。三溝閘。迤南。直昭關。埧鰍魚港口。東岸直小三閘。菜花港口。東岸迤北。直二閘。埽工。

奶奶廟港口東岸直奶奶廟陳家港口東岸稍北直城隍廟馬頭木排港口東岸直萬壽宮迤北直八佛柱紅橋港口東岸直埧巷口小石橋港口東岸直竹巷口鐵牛港水自惠政橋來港口在薛家嘴頭南錢家嘴頭北東岸直鐵牛灣薛家嘴頭先大夫外家舊居地也醇家舊居在其西北當惠政橋東南梁家港水自福壽律院今稱茶庵前七截橋來港口東岸直南大王廟母家港口在新越河頭北東岸遙直金灣北閘即六閘其迤南經越河入運者爲諸田溝

府志言自母家港以次而北諸港

自母家港而北至鯀魚港俱匯爲後河北

接邵伯湖。後河又西南匯爲董家湖。西北則入朱家湖。朱家湖之南口南流爲王家河。西有梅家莊、閻家莊、田溝。東有胥家莊、田溝。王家河又南流至孔家橋與董家湖水合。東南行爲尤家窪。引河流入尤家窪。王家河又於尤家窪引河稍西分一支河。亦西南行。有錢家莊、葛家莊、謝家墳、卜家嘴西、卜家嘴東、田溝五處。與尤家窪俱入越河。越河在運河西。北對東岸金灣北閘起。由運河分出。迤南與東岸西灣埧相對止。歸入運河。按董家湖今莫詳所在。焦氏言舊圖邵伯湖之南有董家湖。規其所在。蓋卽白茆新城朱家三湖。今劉家嘴以西有董家嘴。其所當之。

湖卽白茆之東。然則所稱董家湖者將謂是耶。甘泉續志言閭家套受朱家湖及王家莊新河之水。胥家莊受朱家湖及王家莊新河之水。有溝一道。自王莊新河西岸至胥莊止。梅家莊受朱家湖及王家莊新河之水。有溝一道。自王莊新河西岸至梅莊止。葛家莊受董家湖及尤家窪新河之水。有溝一道。自尤家窪新河西岸至葛莊止。謝家墳受董家湖及尤家窪新河之水。有溝一道。自尤家窪新河西岸起至謝家田止。錢家莊受董家湖及新河之水。有溝一道。自尤家窪新河西岸起至錢莊止。卜家嘴受董家湖及尤家窪新河之水。有東西二溝。自尤家窪新

河西岸起至卜家田止。以上諸溝長不過二百丈。寬深不過四五尺。每年引水。農戶合力挑浚。據此六湖而外。蓋實有董家湖。又南匯小新塘雷塘。水入運者有槐子河。

槐子河。江都志所稱槐家河也。志言槐家河在城東北十五里。

本槐姓所開。故名。自陳公塘接雷塘。引水至灣頭。

按今陳公塘由帶子港入

運不至灣頭句疑誤

入運河。又淮子河。

按淮亦作懷

在城東北十二里。西接雷

塘。東達運河。與槐家河相屬。府志言運隄又南有懷子河。匯小

新塘。上下雷塘之水達槐家河入焉。雷塘在府城西北十五里。

上塘舊長廣六里餘。下塘長廣七里。卽雷陂。其名始見江都王



傳。小新塘在上雷塘之東北。水注上雷塘。轉注下雷塘。舊亦長  
廣二里餘。南宋趙范殄鉅賊李全處。其時露布有云。奮幟麾軍。  
開關延客。實精兵於堡塞。蹙酋魯於新塘。此三塘與句城塘及  
儀徵縣境陳公塘。號揚州五塘。閱千餘年。修築疏濬。各有成效。  
逮明嘉靖中。五塘爲權豪佔廢。國朝雍正六年。議復。不可止。

將烏塔溝接句城塘口

計長二千八百七丈

槐子河接小新上下雷塘口

計長一千八百五十四丈

挑濬其儀徵縣帶子溝至陳公塘。見今接連運河

毋庸挑濬。按明盛儀亟稱用塘之利。作五塘定議。其略曰。江都

縣

時未分設甘泉

有上下雷塘。小新塘。句城塘。儀徵縣有陳公塘。今之

所謂五塘也。自漢時吳王濞有雷陂釣臺。陂卽塘也。後江都王建游雷陂。蓋古有陂而二王以爲釣遊之地。至獻帝建安四年下邳陳登爲廣陵太守。治山陽築塘。民享其利。號曰陳公塘。案史登有威名。性兼文武。其所築豈止眞州。凡淮揚之塘堰皆其經理也。考其地勢。西高而東下。壽在西。淮揚在東。水瀉何利之有。登之塘自壽而來。不止一重。水有蓄洩。高卑皆利。其在揚也。五塘在上流。漕隄在其中。捍海堰則在其下也。晉隋唐宋均爲漕農之重。故盡心焉。明漕艘鹽筴軍屯民田咸資其利。故以其事屬之平江伯。而平江集古人之大成。要之自登始也。唐貞觀

十八年揚州大都督長史李襲譽引雷陂水又築句城塘以溉田八百頃。有愛敬陂水門。開元初青苗使杜佑爲淮南節度使。決雷陂以廣灌溉。斥海濱棄地爲良田。積至十餘萬頃。貞元四年節度使杜亞自蜀岡之右引陂水趨城隅以通漕運。溉夾陂田。長慶二年鹽鐵使王播自閶門外古七里港引陂渠注官河。以便漕運。此唐人之用塘見於唐書者如此也。宋熙甯九年正月劉瑾言。陳公等塘可興置。乞令轉運使司按覆從之。宣和二年九月以真揚等州運河淺澀。委陳伯亨措置。三年詔。今運河歲淺澀。當詢陂塘蓄水之地。講究措置悠久之利。以濟不通。淳

熙七年。漕臣錢沖之。自發卒帖築周迴塘岸。建置斗門石礎各一所。乞於楊子尉階衙內帶兼主管陳公塘六字。或有損壞。隨時補築。其屬李道傳爲記。靖康時。朝廷方督運綱運渠壅塞。詔淮南運使陳邁引句城陳公塘達於河渠。此宋人之用塘見於宋史者如此也。元人海運疏於漕河。而至元十八年。猶造閘於上雷塘者。蓋漕河非塘水。則南北不通故也。明洪武八年。開平王北征。按開平王卒於洪武二年。句疑誤。軍需器械船至灣頭。河淺不能進。奏開四塘。下水三尺五寸。官河增二尺六寸。一時得濟。十四年旱。解京御鹽船至灣頭淺不行。開塘放水。其船始達。時兩淮運司

專理塘也。永樂二年。平江伯陳瑄總漕。全資塘水濟運。是時塘立塘長二名。塘夫七十名。看守塘內積水常八九尺。非至旱運河淺澀不敢放。宣德成化正德閒屢加修治。嘉靖十三年。知府侯秩建議重修句城塘。增大閘一座。減水閘二座。十八年。運河水涸。管河郎中畢鸞白於漕河兩都御史及巡鹽御史。令府縣督役重修。時所修上下雷塘。小新塘。陳公塘。東塘。柳塘。橫塘。鴨塘。凡江儀之塘一十有三。今之所修者蓋九。是後有倚勢占塘者。將塘閘石拆移他用。於是時水暴至。不能節制。徑入高寶山陽諸湖。溢決運隄。東方州縣盡沒。而灣頭以南河道淺涸。運舟

阻滯濬亦不通。儀言塘之所繫如此。及讀潘季馴河防一覽。不  
 以爲然。其言曰。或問五塘蓄水濟運。先年設有是閘。今皆圯矣。  
 可不復舉乎。應之曰。馴初至是時。亦嘗銳意求復。反復行勘。查  
 得小新塘於上下雷塘相接。西去揚州郡城十餘里。水由淮子  
 河入漕河。句城塘西去揚郡幾三十里。水徑奔儀徵。由響水閘  
 出江。陳公塘隸儀徵縣。其水亦奔響水閘出江。句城陳公二塘  
 地形高亢。水俱無源。惟藉雨積。小新上下雷三塘。受觀音閣後  
 上方寺後并本地高田所下之水。局面窄小。蓄水無多。今若慮  
 漕渠淺涸。借此水濟之。則不宜築塘以障其流。縱有閘座。宣泄

無幾。且冬春運河水淺。彼先涸矣。若慮湖水漲漫。借此塘障之。則諸水皆從揚儀徑奔出江。與諸湖了無干涉。如欲復前人之故業。蓄水以溉高亢之田。於民未必無益。但民間承佃爲田。輸價不貲。歲納之課又不貲。必須盡行償貸。築隄建閘。費尤不貲。矧田高之民欲積。田窪之民欲泄。築隄建閘之後。盜決者多。必須添設官夫防守。種種勞費。難於措辦。如季馴言修復五塘。窒礙實多。至國朝工科給事許承宣有請修塘溉田一疏。以爲河臣以治河爲急。而不及州縣陂塘之利。州縣亦以治水諉之河臣。所有陂塘廢爲荒墟。無所經畫。固宜遇旱則水泉盡塞。遇

水則疏導難施。考昔開濬五塘。功不殫述。厥後湮廢。塘利遂絕。然其間石橋梁猶存一二。若能急爲修復。潦則有瀦蓄之處。而不至泛隄。旱則有灌溉之資。而兼可濟運。此說又與潘異愚謂黃未奪淮以前。運河常苦水少。五塘修復。誠不可緩。自黃奪淮。淮俱入運。時虞漫溢。方苦水多。形勢不同。世變爲之。不可一律論也。又按新唐書地理志云。江都有愛敬陂水門。貞元四年。節度使杜亞自江都西循蜀岡之右。引陂趨城隅。以通漕。溉夾陂田。又杜亞傳。興元初。拜淮南節度使。至則治漕渠。引湖陂築防庸入之渠。以通大舟。夾隄高卽田。因得灌溉。劉夢瞻以爲此邪。



溝運河借塘水濟運之始並詳敘唐宋藉塘濟運之事及五塘漸廢之由載揚州水道記徵引浩博備錄之以資考證其言曰新唐書李襲譽傳擢累大都督長史揚州江吳大都會俗喜商賈不事農襲譽乃引雷陂水又築勾城塘溉田八百餘頃百姓獲其利又新唐書地理志江都東十一里有雷塘貞觀十八年長史李襲譽引渠又築勾城塘溉田八百頃是時江南之漕無多襲譽所引之渠與所築之塘專以溉田非以濟運新唐書食貨志唐都長安而關中號稱沃野然其土地狹不足以給京師備水旱故常轉漕東南之粟高祖太宗之時用物有節而易贍

水陸漕運。歲不過二十萬石。故漕米減。自高宗以後。歲益增多。而功利繁興。民亦罹其弊矣。開元十八年。裴耀卿條上便宜曰。江南戶口多。而無征防之役。然送租庸調物。以歲二月上道。至揚州。人斗門。卽逢水淺。已有阻礙。須留一月以上。至四月以後。始度淮入汴。多屬汴河乾淺。請於河口置倉。使江南之舟不入黃河。黃河之舟不入洛口。耀卿言。二月上道。至揚州。入斗門。卽逢水淺。是開元時。揚州運河已苦水淺也。食貨志又云。肅宗末年。史朝義兵分出宋州。淮運於是阻絕。江淮粟帛。由襄漢越商於。以輸京師。代宗廣德二年。以劉晏領東都河南淮西江南東。

西轉運租庸鹽鐵使。凡漕事亦皆決於晏。晏卽鹽利僱傭分夫督之。隨江汴河渭所宜。故時轉運船由潤州陸運至揚子。斗米費錢十九。晏命囊米而載以舟。減錢十五。由揚州距河陰斗米費錢百二十。晏爲歇艍支江船。每船受千斛。十船爲綱。每綱三百人。篙工五十人。自揚州遣將部送河陰。江船不入汴。汴船不入河。河船不入渭。江南之運積揚州。此揚州有轉般倉之始。宋因之。汴河之運積河陰。河船之運積渭口。渭船之運入太倉。歲轉粟百一十萬石。無升斗溺者。是代宗廣德時。揚州運河水淺。已立轉般之法。舊唐書杜亞傳。貞元四年。揚州官河填淤。漕輓湮塞。又僑寄衣。

冠及工商等多侵衢造宅。行旅壅滯。亞乃開拓疏通。公私悅賴。

新唐書食貨志云。杜亞濬渠蜀岡。疏勾城湖。即勾城塘。愛敬陂。起隄。

貫城以通大舟。梁肅爲杜亞作通愛敬陂水門記云。歲在戊辰。

戊辰爲貞元四年。揚州牧杜公命新作西門。所以通水庸。致人利也。又

云。驗圖考地。謀新革故。相川原。度水勢。自江都而西。循蜀岡之

右。得其浸曰勾城湖。又得其浸曰愛敬陂。方圓百里。支輔四集。

盈而不流。決而可注。圖以上聞。乃召公徒。修利舊防。節以斗門。

灤爲長源。直截城隅。以灌河渠。水無羨溢。道不迴遠。舊傳言僑

寄衣冠及工商等多侵衢造宅。此指蜀岡下江都城內漕河而

言。

唐江都縣治在雷塘西十一里。

兩岸爲民居所佔。故河益填淤。食貨志言濬

渠蜀岡者。亦指城內漕河而言。云疏勾城湖。愛敬陂起隄。貫城以通大舟。梁肅記言。新作西門。引二渠直截城隅。是由陳公勾城二塘起隄。數十里。貫江都西門城內。漕河與今運河情形迥別。嘉慶新志。陳公塘在儀徵縣東北三十里。勾城塘在儀徵縣東北四十里。與甘泉縣接界。其水南流至烏塔溝。入運。雷塘在城西北十五里。上塘長廣共六里餘。下塘長廣共七里餘。小新塘接連上雷塘。東西闊一百丈。南北長一百七十丈。其水注上雷塘。轉入下雷塘。由槐子河東流入官河。長廣共二里餘。江都

志云。上雷下雷小新勾城四塘皆隸江都。

時未分設甘泉

惟陳公塘隸

儀徵縣。案唐書食貨志云。疏句城湖。愛敬陂。權德輿杜亞神道

碑云。醴二浸於蜀岡之西。是以勾城湖。愛敬陂爲二處。愛敬陂

卽陳公塘。儀徵舊志於陳公塘下引元和郡縣志云。百姓受塘

利。更塘爲陂。名其陂曰愛敬陂。是以愛敬陂專指爲陳公塘。其

實五塘皆陳登所築。五塘皆名爲愛敬陂。杜亞引勾城陳公二

塘。而梁肅作記。統名爲通愛敬陂水門。是勾城塘亦得名愛敬

陂也。太平寰宇記云。江都縣愛敬陂在縣西十五里。

此據唐江都舊志言

漢陳登爲廣陵太守。初開此。百姓愛而敬之。因以爲名。亦號陳

登塘是亦不專指去儀徵三十里之陳公塘也。汪氏中廣陵通典云。登於城西濬上。雷下雷小。新勾城陳公五塘。四境沾溉。歲用豐稔。民呼爲愛敬陂是也。揚州五塘。陳公塘最大。勾城塘次之。儀徵舊志云。陳公塘周紆九十餘里。勾城塘東西闊三百五十丈。南北長一千一百六十餘丈。是此二塘最大。故可藉以濟運。宋孝宗淳熙九年。錢沖之修陳公塘。奏曰。大中祥符閒。江淮發運置司。眞州歲藉此塘灌注長河。流通漕運。其塘四周百里。東西北倚山爲岸。其南帶東則係前人築壘成隄。以受啟閉。廢壞歲久。見有古來基址。可以修築。楚州參軍李孟傳爲之記曰。

眞州揚子縣有塘曰陳公。漢建安中。廣陵太守陳登所鑿。周廣  
九十餘里。西南所至全隸揚子。惟東北接揚之江都者僅十之  
二。倚山爲形。獨一面爲隄以受啟閉。凡八百九十餘丈。岡勢峻  
昂。環汊三十有六。畢匯於此。故停漫涵蓄。爲利不貲。異時公私  
取給。纔下其尺寸。則已贍足。明盛儀五塘定議曰。宋靖康時。詔  
淮南運使陳遘引勾城陳公兩塘達於河渠。元人海運疏於漕  
河。然至元十八年。猶造閘於上雷塘者。蓋漕河非塘水。則南北  
不通故也。洪武八年。開平王北征。軍需器械船至灣頭。河淺不  
能進。奏開四塘。下水三尺五寸。官河增水二尺六寸。一時得濟。



十四年旱。解京御鹽船至灣頭淺。擱開塘放水。船始得行。是時塘務爲兩淮運司專管。永樂二年。平江伯陳瑄總理漕河。全資塘水濟運。十五年。欽取皇木。時值淺阻。亦開塘下水以濟之。時設立塘長塘夫。常用看守。塘內積水常八九尺。非遇至旱。運河淺澀。不敢擅放。宣德十年。奏改五塘屬府專修。不意是後有倚勢占塘者。將塘閘之石毀拆移徙。以至時水暴至。不能節制。徑入高寶山陽諸湖。溢決隄岸。東方之州縣盡沒。而灣頭以南河道淺涸。運舟阻滯。濬亦不通矣。潘季馴云。某初至時。亦嘗銳意求復。反覆行勘。查得勾城陳公二塘。地形高阜。水俱無源。惟藉

雨積。小新上下雷三塘受。觀音閣後及上方寺後並本地高田所下之水。而局面窄小。蓄水無多。故漢唐二臣築塘積水以爲溉田之計。非以資運也。今若慮漕渠淺涸。借此水以濟之。則不宜築塘以障其流。縱有閘座宣洩無幾。且冬春運河水淺。彼先涸矣。若慮河水漲漫。借此塘以障。則諸水皆從揚儀徑奔出江。與諸湖了不干涉也。張甯議云。勾城一塘。膏壤凡九千六百畝。四圍皆山起。高可二里許。止東南一蹊可通。烏塔溝入官河。且中又無宿水可蓄。不過候時雨暴集耳。夫雨多則田已先潤。何藉於塘。雨缺塘亦焦釜。民田何賴焉。卽如說者有可蓄。亦不過

灌烏塔兩岸耳。其餘固不能以長綆汲而上也。以溝岸之田灌  
溉無幾。而先沒九千六百之膏腴。孰爲勝算乎。上雷下雷大抵  
若此。惟有小新一塘。差可蓄水。蓋此塘僅二百畝。身處其高。有  
逕遶墩之水。汨汨不絕。穿中而過。倘設一減水閘。少蓄多洩。可  
以灌數千畝。餘故不敢概論。此皆言五塘之不能復者也。嘉靖  
中。鄭曉有議變塘田。湊築瓜城疏。先是仇鸞佔塘爲田。及鸞事  
敗。民間各興苟得之心。赴府告佃者紛紛。是時黃河入運。江都  
運河止患水多。無須藉塘濟運。故曉欲依時值變賣。至是五塘  
不可復復矣。國朝雍正五年。廷臣欲修復五塘。勘明塘已爲

田雖開無益。遂改照地畝升科輸賦。蓋近塘之民。每每盜開成田。勢豪之家。往往夤緣討佃。亦不自仇讐。始按劉攽爲其兄敞作行狀云。至和二年。王文安公遷參知政事。公有列親嫌。求知揚州。上許之。揚州雷塘。卽漢江都之雷陂也。舊屬民。自唐以來耕種其中。往數十歲。官取蓄水以備漕運。舊田主二十六家皆奪業失職。官始議以他田償之。竟無與也。然塘亦破決不修。漕運未嘗賴此。發運使因以假揚州種稻。而舊田主二百餘口皆饑寒。縣官莫省。及公至。持太和年契書詣府自訟。公卽判還之。見彭城集馬駙谿谷生傳。刊溝西有漢人舊陂。決水種稻。歲可得萬

石羣赴生曰。事主兩郡倅。兩倅皆有子從生游。生啟口卽得。願奉陂旁上畝十之六爲生壽。是自宋元以來民已佔塘爲田。後更積重難返。五塘遂不可復。然潘季馴謂五塘之設。專以漑田。非以資運。則又失之。

其運河以東諸水皆運河之所分洩。

府志言。運河東岸高郵三十里鋪南接甘泉縣界爲露筋鎮。又南爲荷花塘。又南爲昭關埧。在邵伯鎮北五里。乾隆二十二年與高郵州南關新埧同時建。合南關大埧五里中埧車邏大埧定爲運河五埧。上與高堰五埧較準尺寸。相爲表裏。此埧下開。

支河流入苻絲湖。北入淶洋湖。經總橙子河東入棋盤蕩。由梓新河歸入串場河。出范隄。由丁溪閘入海。串場河者。南自泰州

海安首受運鹽河水。

此灣頭埧下之運鹽河下同。

東北至通遠橋。少折而西

北。淤溪

河防志。淤溪水經何杲山。胥子河亦至苦水洋。

秦潼之水上。自泰州城北來匯。

經東臺縣北行。直抵鹽城縣。爲南串場河。又北抵阜甯縣。爲北

串場河。所受之水。自興化以南。如梓新車路白塗諸河。興化以

北。大縱湖以東。各支河皆受焉。又南爲二閘三閘。俱有引河歸

入苻絲湖。又南爲邵伯鎮。又南爲毛家橋。支河閔家橋支河匯

入南塘。歸入艾陵湖。艾陵湖在邵伯鎮東。阮昇之記云。齊高帝

建武五年。遏艾陵湖水。立裘塘屯。卽此處也。其水正東出者。直至泰州。以北入淤溪。秦潼歸。串場河。其東南出者。經仙女廟。入運鹽河。其東北出者。分爲二支。一爲宗村河。稍南入官河。一爲小紀河。經淶洋湖。東入總橙子河。運隄又南爲北閘。又南爲中閘。又南爲金灣新埧。與北中二閘水俱匯爲金灣新埧河。至人字河頭。分爲越河。俱穿運鹽河。南出江都縣境之芒稻河。東西二閘歸江。運隄又南爲金灣舊埧。其水亦穿運鹽河。南出江都縣境之董家溝。會芒稻河。歸江。運隄又南爲東灣埧。又南爲西灣埧。兩埧水匯爲東西灣埧河。穿運鹽河。南出江都縣境之石

洋溝會廖家溝入江。運隄又南爲鳳皇橋河。亦穿運鹽河南出江都縣境之廖家溝會石洋溝入江。運隄又南爲壁虎橋河。亦穿運鹽河南出江都縣境之廖家溝石洋溝入江。運隄又南爲灣頭閘。閘下水東行爲運鹽河。傳爲吳王濞所開。通海陵倉。自灣頭河開起。東行七十里至斗門入泰州境。又東過姜堰海安入通州如臯境。東抵通屬各場。自灣頭閘下起。其北岸來水。壁虎橋水。鳳皇橋水。東西灣埧水。金灣新舊埧水。及江都境之高家埧。孔家涵。徐家涵。楊家渡。顧家圩。五里廟。景鐵溝。宜陵涵。龍耳河。以次而東。諸水皆通焉。其南岸則廖家溝。石洋溝。董家溝。



芒稻河秦塘河白塔河或合或分皆入江之路按以上所紀皆  
有名之水其無名者志固弗能詳也又甘泉續志言毛家塢受  
南塘之水舊有支河自南塘起至九家田止閔家橋亦受南塘  
之水舊有支河自南塘起至閔家田止黃泥嘴受艾陵青蕩湖  
之水舊有支河自青蕩湖起至溪子河止黃花嶺受艾陵湖水  
舊有溪子河自黃泥嘴支河至丁溪即丁溝大河止戚家汊受青  
蕩湖水舊有支河自延壽寺起至溪子河止高彭橋受青蕩湖  
水舊有支河自青蕩湖起至孔家涵止以上諸河長者至數千  
丈惟閔家橋僅及百丈寬或逾三四丈深亦至丈餘俱農戶按

田合力挑浚。按此敘南鄉支河六條而已。餘亦弗能詳也。

支渠交錯

運河東岸北自高郵入界。隄下有界牌溝。東接淶洋湖。有橋跨

溝。上曰淶洋橋。橋北隸高郵。橋南隸甘泉。

溝心爲界

運隄又南有露

筋鎮。鎮南隄下小河東接淶洋湖。運隄又南有龍船塘。塘迤東

有來聖庵。庵南舊有邵伯汛署。今圯。署東北有小河。東接淶洋

湖。運隄又南爲腰鋪汛。汛南隄下小河東接淶洋湖。運隄又南

爲小腰鋪。鋪南有薔薇溝。據方輿勝覽。相傳卽古之薔薇村地。

接高郵永貞港。今按淶洋湖南接荇絲湖。有戚墅廟。鎮河甘泉。

續志所稱戚墅廟受滌洋恆子湖水者是也。薈薇溝東受戚墅廟鎮河水於戚墅廟鎮北。運隄又南爲蔡家潭。迤南隄下一水東受戚墅廟鎮河水於戚墅廟鎮南。運隄又南爲荷花塘。又南爲竹林寺。寺南隄下一水東接苻絲湖。李漢南鄭言苻絲湖中有港。南自北擺渡來入湖中。北接戚墅廟鎮河。復界滌洋湖中。統名太師港。運隄又南爲嵇家閘。汎焦氏言有裔翁者富於財。當明季河伯爲災。上下河艱於疏理。翁親赴邑中願輸財以通水利。於邵伯鎮北造閘一座。隄之北水自上流而下。隄之左右百里居民實利賴之。因名裔家閘。後改爲嵇家閘。翁之元孫德林字子懋事

見謝九成  
祭子懋文

又河防志言東隄舊有嵇家閘卽鯀魚埧因水衝卸

康熙四十年改於昭關廟建滾水埧將嵇家閘缺口堵塞今仍  
存閘名閘南昭關埧引河東歷宋趙莊接苻絲湖運隄又南小  
三閘引河東接苻絲湖又南爲碾子頭汎汎北運隄下一水東  
接苻絲湖碾子頭汎南隄下水匯爲包塘塘當鎮北門迤西鎮  
北小溝水入焉塘水東出二支一支東北接苻絲湖一支南過  
板橋苻絲湖南接艾陵湖有渠數支其西一支渠有渡二北近  
苻絲湖者曰北擺渡南近艾陵湖者曰南擺渡板橋迤南分二  
支一支南接神路後河一支東南接神路後河合爲一東接北

擺渡南南擺渡北西一支渠。北擺渡之東由苻絲湖南出者爲江家蕩。南擺渡之東由艾陵湖北出者爲釣魚溝。兩水首尾相值而中不通。釣魚溝之東由艾陵湖北出一水稍折而西達江家蕩。上有橋曰磚橋。磚橋之東有渠一支。北接苻絲湖。南接艾陵湖。上有橋曰板橋。邵伯鎮南門外有南塘。中界一隄。析爲裏塘。外塘裏塘水自六開迤東分一小支入蕭家口。由蕭家口分流過留養所後趙家莊北。繞薛家祖塋前西流過閔家橋入裏塘。又北出寶公橋下入外塘。外塘分二支。一支東北出至油坊頭。未至油坊頭復出小水。南過馬塘橋以濟民田。一支北出爲

玉帶河有橋五。北至蔡家灣。漸迤而東。至東河頭。北出一水。過永濟橋。卽關帝廟橋。又北過銀錠橋。折而西。過曲水西流坊。折而北。

又折而東。爲神路後河。其東河頭水。東會外塘。東北出一支。東至油坊頭。入艾陵湖。油坊頭者。同年徐來峯宮允家雲川閣舊址也。艾陵湖南接青蕩湖。有渠跨渠橋三。曰水星廟橋。曰寶家橋。曰張家大橋。青蕩湖北與艾陵湖接。其西南出一水。至西倒埧。蕭家口。由農民啟閉。以資灌溉。三里至黃堡塘。築埧截之。俾水分繞諸田溝。毋洩於湖。以上敘淶洋荇絲艾陵青蕩諸湖西面水畢。司境下河之水。以孔家涵水。北經喬墅。又北沿艾陵湖。又北歷楊家莊。鎮真。

武廟鎮又北抵邱墅閣爲經流

孔家涵在江都境仙女廟東七里首受運鹽河水北流訖淤其

河接高郵界孔家涵經流自南來過馬家橋由陳家莊西北流入境

過軍王廟西東出小水當軍王廟南經流又北過尤家橋青蕩

湖南出一支過蔣家樓東又南過桑樹廟東折而東來會又北

有高彭橋水出其下志所稱高彭橋受青蕩湖水舊有支河自

青蕩湖起至孔家涵止者也經流又北至吉家漢

志作戚家漢

東出

一支東流過丁家伙鎮南又東流過延壽寺而東謝家埧水自

西南來會焉又北流入溪子河丁家伙鎮水由吉家漢支河北

出一支北流過鎮中鎮有橋水出其下又北流東出一水爲江

家套。又北流入溪子河。經流由吉家。汊北流。有鄭匯橋。水出其下。又北流。青蕩湖水東北出一支來會。又北流。稍折而西。過喬墅鎮中。鎮有橋。水出其下。又北流。西出一小支。其經流北接艾陵湖。其支流西接艾陵湖。喬墅東出一河曰溪子河。東流過高橋鎮中。又東流過商王莊南。分三支。北一支當丁溝鎮南。中一支南一支。又在其南。俱東入丁溝。溝東隸江都。溝西隸甘泉。溝心爲喬墅高橋丁溝諸地。統曰黃花嶺鄉。丁溝一名丁溪。志所稱黃花嶺。受艾陵湖水。舊有溪子河。自黃泥嘴支河至丁溪大河止。是也。黃泥嘴在喬墅南不及一里。丁溝水自江都境魏家莊



北流入境。謝家埧水自西南過俞家莊來會。又北。溪子河東流入焉。又北。過丁溝鎮中。又北。有支渠自王家廈南。任家廈北。東流入焉。又北。有支渠自東西沈廈南。葛家廈北。東流入焉。當葛家廈南。王家廈北。東出一支。東流曰逍遙港。甘泉東境至此止。稍東港南。隸江都港北。隸泰州。港心爲界。喬墅鎮北。經流東出一小支。過李彭橋下。又東抵王寅家橋南。南接溪子河。北過王寅家橋及余家橋下。艾陵湖東出一支。曰五汊港。東南流過樊墅廟南。又東南流會於余家橋北。余家橋下水北流過陳寡婦橋下。又北。匯爲蓮花蕩。樊墅廟東。北出一支。東北流。艾陵湖東出一

支東南流過潘家橋徐家橋來會東接蓮花蕩蓮花蕩又北匯  
爲吳八家蕩經流沿艾陵湖東復北出經楊家莊鎮中爲楊家  
莊鎮河鎮有橋水出其下鎮南東出一支流而東眞武廟鎮中  
東出一支折而南過吉家橋尹家橋而南來會又東流過吳八  
家蕩北劉墳南又東過劉家廬北北接東銀溝楊家莊鎮又南  
東出一支過觀音長壽庵南東入吳八家蕩觀音長壽庵東又  
南出一支接潘家橋西北又北出一支接楊家莊鎮南吳八家  
蕩東南出一支東流過吳家巷南其東北出一支繞老官尖北  
東南流抵張家莊東北分二支一東流入泰州界一南流來會

又東流分二支。北一支東過葛家廈。南一支東過王家廈。南俱入丁溝。楊家莊鎮南。當古家莊西南。經流西出一河。西北流抵刁莊東南。蒙家套水自苻絲湖東出。折而南來會之。龍王港水自艾陵湖北出來會之。蒙家套北。嵇家汊水自苻絲湖東出。抵張家尖。分二支。南一支亦會古家莊河於刁莊東南。東一支曰採菱港。東流入楊家莊鎮河。經流又北。經眞武廟鎮中。爲眞武廟鎮河。鎮有橋。水出其下。戚墅廟河之東北。接淶洋湖。南接苻絲湖。爲陸莊廟河。陸莊廟橋跨其上。淶洋湖東南出一小支。東南過苗家橋而東。陸莊廟橋北東出一支。東流過崔莊分二

支一東南流經真武廟鎮中入真武廟鎮河。一北流會於苗家橋東。又分二支。一東過金墅庵北。東入真武廟鎮河。一北過張四娘莊東。北入淤其河。淤其河由淶洋湖東出。東流經邱墅閣。真武廟河經流自南來。會於邱墅閣鎮中。淤其河又東。三帶溝水自南來入焉。淤其河又東。小金溝水

志作小  
徑溝

自吳八家蕩南

來過丁家橋。呂石橋。陳龍橋。徐安橋。周橋下。北流入焉。真武廟北。邱墅閣南。經流東出一支。東流過九華庵南。分二支。北一支北流過尤家橋。楊家橋。北入淤其河。爲三帶溝。東一支東流抵陳龍橋南。入小金溝。淤其河自小金溝又東過永安鎮中。鎮有

橋水出其下。鎮北隸高郵。鎮南隸甘泉。河心爲界。淤其河。又東。東銀

溝水。自劉家廬北。西北出一支。北流過殷莊橋。蕭家庵橋。李馬

橋。余家莊橋。潘家莊橋。下北流入焉。淤其河。又東。抵西查鹽莊

西。東銀溝水。自劉家廬北。東北流。又折而北流。來入焉。東銀溝

東。隸泰州。西隸甘泉。溝心爲界。淤其河。府志作淤溪河。云東通淶洋

湖。西抵運河隄。今東通淶洋湖。西抵運河隄者。爲界牌溝。然則

界牌溝亦可稱淤其河也。府志輿圖作玉溪。其題字列永安鎮

西。按水之在淶洋。艾陵諸湖。東者。東西河。皆東流。南北河。有時

北流。有時南流。五埧不啟。高郵境內南關大埧。新埧五里埧。下車邏埧。甘泉境內昭關埧。爲五埧。

河水淺則孔家涵來源在司南境率北流若運河水漲五垣中有啟者則北境來源驟增倍徙遂改南流或江湖低落而淥洋艾陵諸湖水勢猶盛亦南流蓋北流者常也其南流則變也今

道其常

以上敘淥洋苻絲艾陵青蕩四湖東面水畢

邵伯鎮南裏塘水西逼運隄塘

南運隄上爲金灣北閘

今稱六閘並稱閘北地爲六閘

金灣中閘

今稱二閘

金灣新

垣三路匯爲金灣新垣河東南流過都天廟東又過七里庵東

東南流左出一支如人字形名人字河俱東南流穿運鹽河接

江都界運隄又南爲金灣舊垣河東南流過娘娘廟東又過嵇家庵東東南流穿運鹽河接江都界運隄又南爲東灣垣爲西

灣。埧。埧下匯爲東西灣。河東南流。過娘娘廟西。又過稽家庵西。  
東南流。穿運鹽河。接江都界。運隄又南。爲八塔鋪。汎汎南。爲鳳  
皇橋。河東南流。穿運鹽河。接江都界。運隄又南。爲瓦窯鋪。新河  
瓦窯鋪。汎在其南。新河東南流。穿運鹽河。接江都界。運隄又南。  
爲壁虎北木橋。爲壁虎中木橋。爲壁虎磚橋。橋下匯爲壁虎橋。  
河東南流。穿運鹽河。接江都界。運隄又南。爲灣頭閘。閘下水東  
行。爲運鹽河。金灣以南諸水。皆穿此東南流。以上敘鎮南運河  
分洩入江諸水畢。  
右所敘。皆運河以東水之在邵伯巡司境者。惟灣頭運鹽河屬  
江都。又按江都陸志言。漢吳王濞煮海爲鹽。因復開邗溝。自揚

州茱萸灣頭

即灣頭

通海陵倉及如臯蟠溪。此運鹽河之始也。河自

灣頭起。東行七十里至斗門。

斗門鎮屬泰州

入泰州界。又東行一百六

十里至海安。

海安鎮亦屬泰州

入如臯縣界。又東南行一百一十里至

白蒲。入通州界。又東行七十里至新寨。入海門界。又東行八十

里達呂四場。其支派通各鹽場。皆爲運鹽河。

諸水之委。東則入海南。則入江。

河防志言金灣三閘。

謂北閘中閘新閘

並滾垸。

即金灣舊垸

之水十八里至

人字河。分小支由蕭家口入艾陵湖。鳳皇壁虎二橋及灣頭閘。

水流至董家溝。小支下芒稻河。正流三里會人字河。水勢七分



入芒稻河。三分由運鹽河東流。經宜陵鎮。抵泰州城。又東流。經姜堰。海安。由律法橋下海。按運隄以東。水之在邵伯境者。湖爲大湖。有四。淶。洋。艾。陵。爲大。苻。絲。次之。青。蕩。則府志廳圖所不載。府志言。苻絲湖入淶洋湖。經總橙子河。東入棋盤蕩。由梓新河歸入串場河。出范隄。由丁溪閘入海。蓋兩湖皆入海也。其說艾陵湖曰。其水正東出者。至泰州北入淤溪。秦潼歸串場河。其東南出者。經仙女廟入運鹽河。其東北出者。分二支。一爲宗村河。稍南入官河。一爲小紀河。經淶洋湖。東入總橙子河。今宗村河亦北接小紀河。總橙子河亦歸串場河。蓋艾陵湖水亦皆入海。

也。惟運鹽河或南由白塔秦塘等河入江。或東經宜陵等地由律法橋入海。大抵鎮之東之北左支右汊率宛轉曲折以入海。至金灣以南諸閘。引河則俱穿運鹽河南入江。約言之。諸水東流或東北流者皆入海。南流者皆入江。入海之路遠而紆。入江之路徑而捷。

### 記修防第五

職司修防。駐邵伯鎮者。有江運廳同知。有江防營守備。有甘江汛主簿。有把總。有協防。有下汛協防。

江運同知。駐邵伯東街。初駐邵伯者。爲揚糧通判。兼理監兌漕。

糧事宜。道光二十年。以監兌事宜歸揚州府清軍同知管理。改稱揚糧通判。爲揚運通判。專司河務。道光二十九年。裁揚運通判。歸併江防同知。改稱江防同知。爲江運同知。仍駐邵伯。主簿舊駐邵伯大街。把總駐蔡家巷。守備及兩協防。僦居邵伯民房。協防先止一員。道光八年。增設下汛協防一員。

江運同知統於常鎮通海兵備道。轄甘江汛暨江都江防京口汛河道各工。

江運廳所轄河道各工。上接揚河廳交界起。下至瓜洲江口止。運河共長一萬八千八百五十四丈四尺。計程一百四里三分。

零又鎮江京口起至丹陽呂城三板橋止計程一百四十里零。  
二共計程二百四十四里三分零。東岸隄工共長一萬一千六  
百七十八丈四尺。西岸隄工自露筋起至三溝閘止工長三千  
三百二十四丈。兩岸埽埧工程變遷不一。視水緩急隨時鑲修。  
其東岸歸海歸江閘埧各按水勢情形相機啟閉。按江北運河  
揚運廳舊管四十七里零。江防廳舊管五十七里三分零。共一  
百四里三分零。自裁併廳缺以來均歸江運同知管理。揚運廳  
舊轄甘江汛主簿一把總一協防二。江防廳舊轄江都縣管河  
縣丞一。

駐揚州管運河自灣頭閘起至東石人頭鎮止計程四十三里。

江防汛把總一協防一。

俱駐瓜洲管江都江防二汛。緯道自灣頭開南牆起至瓜洲江口止。計程五十七里三分。運河長一萬三百三十七丈四尺。兩岸俱無工。儀徵縣管河縣丞一。駐儀徵自東石人頭鎮起至响水閘止。計程四十里。兩岸無工。遇淺鹽務估挑清江閘閘官一。駐儀徵。管响水通濟羅泗攔潮。瓜洲司兼管河務巡檢一。駐瓜洲。分管運河自三汊河起自瓜洲花園港一帶江工止。計程二十四里三分。京口汛千總一。協防一。駐京口。自京口江工起至甘露港止。磚石土埽各工共長八百八十七丈五尺。橫越閘閘官一。駐丹徒專司二閘啟閉。並管河道自京口起至呂城三板橋止。計程一百四十餘里。自裁併廳缺以來。均歸江運同知統轄。

與江防營守備共治之。

江防營守備管理甘江江都江防京口運河緯道江工督率汛

弁河兵修防工程。甘江汛額設河兵六十一名。內食戰餉者十二名。守餉四十九名。并江防汛河兵戰餉十七名。守餉六十七名。京口汛戰餉八名。守餉三十二名。共計一百八十五名。統歸江防營管轄。

甘江汛主簿把總兩協防所司河道多在邵伯境內。

甘江汛員弁分管河道。北自揚河廳交界起。南至灣頭閘止。隄長八千五百零八丈四尺。計程四十七里零。隄寬一丈五六尺。至二三四丈不等。運河長八千五百十七丈。河面寬七八丈。至十餘丈不等。內東岸土隄連各閘埧口門共長四千八百丈零。

六尺。磚工閒段其長九百六十三丈八尺。石工閒段其長七百十七丈。埽垣各工連緯道其長二千零二十七丈。又金灣開入裏撐隄一道計長三百八十丈。內隄頭龍尾埽長一百十二丈。當鎮之北東岸有崇家灣工。蔡家潭工。荷花塘工。

崇家灣工。嘉慶十一年漫溢堵築。工長一百五十四丈。蔡家潭工。嘉慶十三年漫溢改於裏首堵築。工長一百四十四丈五尺。至二十年補還臨運。取直緯隄。工長一百三十六丈。其裏首堵築之工淤閉。荷花塘工。嘉慶十三年漫溢改於裏首堵築。埽工長四百九十六丈。至十八年補還正埽。工長五十二丈。裏首圈

越埽工久經淤閉。

西岸有土工。有迎湖石工。有崇家灣工。龔家營工。荷花塘工。

西岸土工長五百五十九丈。內北極宮北首迎溜土隄於道光十一年包砌碎石工長三十二丈五尺。又貞應祠後身於道光十五年圈築越隄工長九十二丈。迎湖石工自北極宮起至三溝閘止。間段共長二千一百八十三丈。道光九年停修頭二淺塘。越灣石工三百四十丈。於裏首取直包砌碎石工長一百九十丈。十年又於小五堡對過並二淺小塘二處改拋碎石工長一百零二丈。十一年又於腰鋪營房對過拋砌碎石工二段長



五十五丈。現在實存石工長一千六百八十六丈。於道光三十年改包碎石。又自通湖港南起至梁家港止。接築土工長一千七百八十八丈。崇家灣西岸。嘉慶十一年堵築柴工。道光元年復包碎石。工長六十六丈。甞家營。嘉慶十三年堵築柴工。二十二年復包碎石。工長一百七十三丈。荷花塘西岸。嘉慶十三年兩年堵築柴工。二十二年復包碎石。工長三百二十一丈。自頭淺塘至荷花塘。有臨運取直緯道土工。

臨運取直緯道土工。自頭淺塘起至荷花塘止。其長一千三百二十八丈。

其西岸分洩湖水入運。由鎮北漸次而南。有黃泥港口。通湖港石  
閘。通湖港口。鰍魚港口。菜花港口。奶奶廟港口。陳家港口。木排港  
口。紅橋港口。小石橋港口。鐵牛港口。梁家港口。母家港口。

按黃泥港口之北舊有露筋小河。口寬十二丈。長八十五丈。久經堵閉。黃泥港口。寬十丈。長一百

二十丈。通湖港石閘。金門寬七丈。兩牆建砌八角裏頭各周長  
八丈。計十一層。道光十四年成。通湖港口。寬十丈。長五百十丈。  
鰍魚港口。寬十丈。長十丈。菜花港口。寬六丈。長八十丈。奶奶廟  
港口。寬六丈。長一百十丈。陳家港口。寬六丈。長一百二十丈。木  
排港口。寬十丈。長七十八丈。紅橋港口。寬三丈。長八十五丈。小

石橋港口寬一丈五尺。長七十五丈。鐵牛港口寬四丈。長九十五丈。梁家港口寬十二丈。長二百七十四丈。母家港口寬四丈。長一百四十丈。

又有舊越河新挑越河。以避東岸諸口吸溜之險。

舊越河口寬八丈。長一千丈。支河長三十六丈。嘉慶十一年。鹽務開挑。通達運河。以便鹽運。普賢墩至觀音庵道光十二年新挑越河一道。計長一千六百二十九丈。口寬八丈。並築緯隄。以便漕行。俾免東岸各口吸溜之險。又八塔鋪鳳皇橋至瓦窯鋪高廟一帶。西岸閒段舊有緯道土工。共長一千零七十丈。年久未修。今圯。

又西接雷塘東達運河有槐子河口。

槐子河口寬八丈五尺長七百四十丈河在府城東北十五里。  
自雷塘引水至灣頭入運河。

東岸分洩運河之水歸海歸江諸口在鎮北者曰昭關有滾坝有  
耳閘在鎮南者曰金灣有北閘有中閘有新坝有舊坝曰東西灣  
有東灣坝有西灣坝曰鳳皇橋有木橋曰瓦窯鋪有新河曰壁虎  
橋有北木橋有中木橋有磚橋曰灣頭有閘。

昭關滾坝一座金門寬二十四丈南北兩裏頭各長十一丈計  
石十一層坝下引河長四百六十三丈水由恆子即荇絲漾洋等

湖入興化境出丁溪白駒等閘歸海。乾隆二十二年造。嘉慶十  
三二十四及道光二年啟放。沖損。道光三年修復。四年冬。埧  
大隄漫缺。湖水驟注。啟放。沖損。用料堵閉。復於六年啟放。宣洩。  
堵築埧。移埧於北首三元宮南。金門丈尺照舊。石牆加高三  
層。道光十年工竣。昭關埧南耳閘一座。金門寬一丈二尺。道光  
十一年造。按此下舊有減水三閘。金門寬八尺。久經堵塞。昭關埧非盛漲不啟。金灣  
以下諸閘埧畢開。水仍日益。乃啟以入海路紆。啟則傷田。不等  
入江路捷也。又按照關埧舊在鎮北五里與高郵州南關大埧即舊五里滾水  
埧。長六十六丈。係石。南關新埧。長六十六丈。係石。乾隆二五  
五。康熙四十一年建。與昭關埧同時建。

里中。中。中。中。

即舊八里鋪滾水堤。康熙四十七年建。牆高石脊一丈二尺。此堤地勢最卑。堤底較諸堤亦為獨深。尤不可輕

易。開。放。

車邏大堤。

長六十四丈。係石堤。康熙四十一年建。

為運河五堤與高堰五堤。

仁義。禮。智。信。

較準尺寸。相為表裏。南河成案。乾隆二十二年。大學士

公傅恆奏。洪湖五堤過水既多。而下游承受僅高郵之車邏等

三堤。未免來多去少。應於昭關地方復設滾堤。滾堤之下開一

支河。更將南關舊堤改建滾水石堤。便與高堰五堤相應。續南

河成案。道光八年。英和等奏。揚糧廳昭關堤四年六年洩放洪

湖漲水。堤底損壞。跌塘甚深。張井等奏。請移地改建。原擬於舊

堤迤南柏家墩之上。照舊制建造。以邵伯士民呈稱。此堤若改

移往南相距更近。懇請移建舊埧迤北之四棚灣地方。當卽親詣各該處履勘。審其形勢。柏家墩之上。原議築埧處所。逼近通湖港口。藉資宣洩。惟究在舊埧以南。相距七十丈。與邵伯地方較近。不無關礙。四棚灣則西有石隄間隔。須於隄上開通口門。使湖水先入運河。再行折流而東。方能歸埧下注。其勢又覺紆緩。且該處民人亦復以有礙田廬墓舍紛紛環籲。竊思湖河水勢漲發。築埧疏宣。原爲保護民生而設。若能將舊埧修復。或再就近往北移建。則該二處民人均不致懷疑畏懼。臣英和同浦後。與蔣攸銛悉心籌議。一面咨會河臣張井等再行詳慎查覆。

旋准張井等以勘得昭關埧舊基跌塘極深。實不能修復。請於舊埧之北三元宮之南刷隄移建。該處土性堅凝。洩水形勢甚便。且下有舊通苐絲湖河形。卽可就作引河等因。咨覆前來。臣查旣據河臣確勘。應卽照辦。但此項埧工。與林家西所建石埧相爲表裏。均係備豫不虞。一經洩放。湖水建瓴而下。於下游地畝。總不免有被淹之處。應令河臣嚴飭廳員。平時堅守。倘遇異常盛漲。萬分喫重。廳員會同州縣相度機宜。方准啟放。非此則斷不准率行宣洩。違者嚴參治罪。所有移建昭關埧連築柴埧。其估銀九萬兩。嗣於九年完工。廳冊作十年。金門仍寬二十四丈上。



迎水各橫長三丈。由身直長五丈。下分水各斜長三丈。兩牆各長十一丈。計石十四層。埧脊高河底一丈一尺九寸。石牆海漫高埧脊一丈一尺一寸。揚糧通判孫國壽承修。孫字虞尊此昭關建埧之始。及新埧移建。地址丈尺也。至啟放之制。高郵境內四埧皆有定則。昭關埧獨無。南河成案。乾隆十八年侍郎嵇璜奏。查水勢異漲之年。高於車邏埧脊四五尺以上。今酌中定議。應以水高埧脊三尺爲準。先將車邏埧開放。至三尺以外。再將五里南關等埧次第開放。二十二年用傅恆議。添建南關新埧及昭關埧。是年十一月嵇璜奏。高郵運河東隄添建石埧已經完竣。

並請酌定水則。如上游五埧過水漸多。高堰誌椿長至九尺以上。仁義禮三埧卽聽過

水。車邏南關二埧過水三尺五寸。開放五里中埧。若車邏南關

二埧過水至五尺。再開放新建石埧。視水勢之大小以爲啟閉。

自無壅積之虞。旋奉 旨著照嵇璜所奏過水尺寸立誌。

埧旁以垂久遠。南河成案續編。道光八年五月張井等奏。高郵

汛東岸設有車邏南關五里中新四埧。以資分洩。歸入下河。從

前原有啟閉水則。嗣因黃水倒灌。運道受淤。不能以時啟閉。下

游田廬動輒被淹。臣等飭道廳妥議具稟。旋據覆稱。遵照乾隆

二十二年奏定水則。車邏南關二埧地勢較高。原係常行啟放。

俾河水得以隨時減洩。如車南二埧石脊過水五尺。再開放新埧。查南關埧石脊高七尺五寸。若過水三尺五寸。則運河水止存一丈一尺。過水五尺。則運河水止存一丈二尺五寸。今昔情形互異。應請酌中定制。以運河之水長至一丈二尺八寸。方可開放車邏埧。長至一丈三尺二寸。再開放南關大埧。長至一丈三尺六寸。再開五里中埧。長至一丈四尺。再開南關新埧。俟河水長符定則。卽由該廳州等隨時啟放。或水雖符尺寸而勢已平定。仍當堅守不放。並以中新二埧地勢較低。請俟水勢平定。首先堵合等語。臣等復與督臣蔣攸銛悉心商酌。所議均屬允

協卽應如稟辦理。並飭令較準水則尺寸。勒石各埧。許官民共見。其聞永遠遵守。按昭關埧與高郵南關新埧同時并建。嵇侍郎摺但言啟放新埧水。則而昭關弗之及。張河督奏定啟放南關等四埧水。則亦不及昭關。惟督臣尹繼善。河臣白鍾山。乾隆二十五年。請將南關車邏等埧。仍封土三尺。俟水勢長至三尺以外。方許啟放。再不能容。方啟五里昭關等埧。詞亦約而不詳。今以歷年啟放昭關時。三溝閘誌椿水深丈尺。考之嘉慶二十四年啟放。係九月初十日。是日誌椿水深一丈九尺三寸。道光二年啟放。係八月十三日。是日誌椿水深一丈九尺。道光六年

六月三十日三溝閘誌椿水深一丈八尺。參將張兆赴昭關埧啟放。嘗奉 旨詰問此皆昭關埧未移三元宮以前事也。

自道光九年移建後。復於道光十二年八月初一日啟放。是日誌椿水深二丈零五寸。二十八年七月二十五日啟放。是日誌椿水深二丈二尺四寸。大約非在二丈以外。不輕議啟也。金灣北閘一座。計二門。每門各寬二丈二尺。閘下引河長三千八百丈。洩邵伯諸湖之水。由人字河芒稻河歸江。金灣中閘一座。計二門。每門各寬一丈六尺。閘下引河長八十丈。水匯入北閘。引河歸江。人字河頭至芒稻閘。引河長四百七十五丈。分洩金灣來水入芒稻閘。下引河歸江。又褚家山埧一道。計長十

二丈。洩水入人字河。匯入芒稻閘下。引河歸江。

金灣新堤一座。口門寬三十丈。外建木

橋。橋下引河長四百丈。水匯入北閘。引河歸江。金灣舊堤一座。

口門寬五十丈。外建木橋。橋下引河長二千六百五十三丈。洩

邵伯諸湖之水。下注董家溝。歸江。東灣堤一座。口門寬三十六

丈。外建木橋。橋下引河長二千六百三十五丈。洩邵伯諸湖之

水。匯入石羊溝。沙河港。歸江。西灣堤一座。口門寬二十四丈。外

建木橋。橋下引河長四百四十丈。洩水匯入東灣堤。引河歸江。

鳳皇橋一座。原建北橋。口寬十丈。南橋口寬十二丈。磚橋橋身

連兩裏頭。計長十四丈。口寬一丈二尺。道光十一年拆除磚橋。

又南首土隄被溜冲刷深塘長七丈。現在口門共長四十三丈。外建木橋。橋下引河長一千五百八十四丈。上洩邵伯諸湖之水。匯入董家溝。石羊溝歸江。瓦窯鋪迤北。道光八年增挑新河。口門寬四十丈。外建木橋。橋下引河長一千三百三十九丈五尺。洩邵伯諸湖之水。入廖家溝歸江。壁虎北木橋一座。口門寬二十丈。道光十年展寬十丈。共寬三十丈。外建木橋。橋下引河長八十六丈。洩邵伯諸湖之水。匯入灣頭閘下引河。出廖家溝歸江。壁虎中木橋一座。口門寬十丈。外建木橋。洩水匯入磚橋引河歸江。壁虎磚橋一座。計二門。每門各寬一丈。橋下引河長

一百五十二丈。洩邵伯諸湖之水。匯入灣頭閘。引河出廖家溝。

歸江灣頭閘一座。金門寬二丈四尺。洩邵伯諸湖之水。由廖家

溝歸江。

閘下舊鹽河至芒稻閘止。計長一千六百二十四丈。兩岸皆高阜民田。無隄工。

揚州水道記言。

金灣以下橋埧開放之制。道光十二年張井奏。三溝閘誌椿長

至九尺以外。不論何時。卽將歸江之金灣以下各橋埧。相度機

宜次第啟放。以期暢達歸江。按此奏盛稱越河之利。

詳運非謂道篇

橋埧開放定制如此也。橋埧開放自有節次。是年運司會同淮

揚常鎮二道。議以三溝閘誌椿爲上游存水之則。在下游則有

長生庵誌椿爲憑。其閒消長各有不同。若啟放歸江各埧。必須



將兩處誌椿及揚州城河水勢。三面較量。以定蓄洩。方無顧彼失此之虞。酌中定議。以三溝開誌椿存水九尺爲度。如存水一丈。酌啟金灣舊埧東西灣埧一丈一尺。添啟鳳皇橋瓦窯鋪埧一丈二尺。添啟人字河褚家山埧。仍隨時察看。長生庵誌椿並揚州城河水勢。以及來源之旺衰。江汛之大小。臨期妥爲斟酌。稟請啟閉。總使揚州城河存水常在五尺以上。云云。蓋金灣舊埧以下各橋埧下游。雖地址高爽。入江路暢。不致如昭關埧啟放有碍。下河田廬。然鹽運漕艘。均須節宣有制。故必以揚州城河水存五尺以上爲準也。惟金灣北閘灣頭閘。鹽艘利涉。故有

十卷之二  
啟無閉以爲常

瓦窯鋪以上均在邵伯巡檢所轄境內

邵伯巡檢所轄境北至露筋南至瓦窯鋪

至下游入江之路則有廖家溝石羊溝董家溝芒稻西閘芒稻東閘漸迤而南入江都縣萬壽司境然其所受固邵伯東岸諸口所洩運河之水也

廖家溝一道原寬四十丈連年汕刷現寬一百三十六丈引河長九百三十丈上洩新河壁虎灣頭等河來水入石羊溝引河出舊沙河歸江石羊溝一道原寬三十八丈現寬四十五丈引

河長三千三百六十七丈。上洩東西灣鳳皇橋。河來水由舊沙河歸江。董家溝一道。原寬三十丈。現寬四十丈。引河長六百二十丈。分洩金灣河之水。由朱公橋匯入芒稻。李墅河。出入港口。歸江。芒稻西閘一座。今稱七閘。明季建。原七門。每門各寬二丈。道光十一年。拆除磯心石底金門。現寬二十四丈。零八寸。上建木橋。橋下引河長三千二百四十丈。分洩金灣人字河之水。由芒稻李墅河。出入港口。歸江。芒稻東閘一座。今稱三閘。三門。每門各寬二丈。閘下引河長四百三十五丈。洩水匯歸西閘。下引河歸江。甘江汛所司。又有孔家涵石閘。秦塘港河頭石閘。白塔河石閘。白

汭河石閘。

孔家涵河面寬三丈六尺。通達下河。興化東臺鹽城阜甯。經鹽務改建石閘。通商民船隻。秦塘港河頭石閘一座。金門寬一丈。水由于家橋張綱溝。萬壽橋入八港口。歸江白塔河。白汭河。石閘各一座。金門各寬一丈。水由焦家蕩。吳家橋入大橋鎮。歸江。堡夫汭兵採草積土。綢繆之計。豫矣。

甘江汭建設堡房二十七座。額設夫五十四名。歲積土二千一百八十方。遇閏加積。原設河兵九十八名。內除裁撥三十七名。實存汭兵六十一名。建設兵堡房十二座。每年冬採額草一萬。

束額柳三千束。積土五百七十方。

當鎮之西。建築重隄。尤爲東埭保障。增卑培薄。是在留心民瘼者。道光三十年。自通湖港南至梁家港。接築西岸。土工長一千七百八十八丈。以禦盛漲。時西風巨浪。按明江都令張甯言。昔論漕河之險者。先高寶次邵伯。而今之水大者。莫如邵伯。最難守者。亦莫如邵伯。蓋高寶昔固稱險。障之則有西隄。而內河成。則湖分於外。人由夾河中行。不知有湖矣。今邵伯一帶。隄與水隣。絕無外障。以故水乘風勢。摧隄若蹴。垤因建二策。其一曰障之。便北自露筋南抵馬家渡。舊隄以東。另築一隄。

此以舊東隄爲西隄。另築一束。

隄也。又至馬家渡而南至八塔鋪舊隄以西另築一隄。此仍以舊隄爲東隄。

另築一西隄也。各接舊隄中作二間。成一夾河。并如高寶之制。費不過

六七萬金。而湖隄可保無事。議不果行。國朝乾隆間。李奉翰

以運河東岸隄工卑薄。邵伯一帶民居稠密。風浪堪虞。請於三

溝間。迤下添築西隄十五里。使東隄有所攬護。經阿文成公奏

停。又不果行。至道光庚戌。議始定。夫湖風浩浩。萬頃西來。不得

以有此重城爲無益也。但高不及東隄。猶虞盛漲漫越。又必創

築堅厚。始不致擊撞傾圯耳。

# 甘棠小志卷二

受業江都趙熙和率男增瑞校字